

四明叢書

張宗祥



知縣俞立庵先生貞木

俞貞木初名楨字貞木後以字行更字有立石澗先生之孫也自少篤志問學尤工古文詞元季不仕洪武初以薦授樂昌知縣改都昌後爲鄉人所誣先生爲人清苦敦行古道著有立庵集

姑蘇志

嚴氏門人

提舉黃樵水先生清老

黃清老字子庸邵武人通經博史登泰定進士累官知制誥國史院編修出爲湖廣行省儒學提舉學者自遠

從之號樵水先生著春秋經旨四書一貫數十卷其詩
存者數十篇有盛唐之風

道南源委

附錄

七歲學屬文鄉先生李玉林見之歎曰是可繼黃童矣
進三山書院山長弗就挾書入深山之中益究其所未
至

朱學之餘

監簿胡先生子實

胡子實初名希孟字醇子永嘉人力學不怠于四書所

得尤深鄭滁孫尹樂清創宗晦書院請主講席多士歸
之咸淳末從班中援元祐陳師道例請于朝得旨授史
館編校尋帶行國子監簿使明州卒著有講義孝經註
習史管見

溫州舊志

高竹澗先生天錫

高天錫號竹澗彭澤人宋季嚴禁道學考亭之學幾廢
先生獨究心審華實辨理欲往來白鹿洞學者咸敬信
之卒之日俄云我欲還造化舊物矣奄然而逝後祠鄉

賢

九江府志

鄉舉楊先生□龍

楊□龍字明夫清江人與吳草廬同歲生自少工進士學元既復貢舉時年六十餘欣然就舉所編易說洞要程朱爲之本而他諸說附焉

吳草廬集

縣尉汪定齋先生一龍

汪一龍字遠翔休寧人宋咸淳進士調句容尉攝縣事歲大饑倣朱子南康遺規爲便民十條行之民無瘠殍淮閩李庭芝辟入幕京口瓜州不守奉母航海南歸宋亡不仕元至元中起教紫陽書院闡朱子之學人稱定

齋先生

安徽通志

學正許先生豫立

許豫立徽州人前爲紫陽書院堂長至元十五年按察使者至謀諸總府以書院地與古郡學地兩易以溪山偉觀爲明明德堂而書其顏得鄉之名進士深于紫陽夫子之書者三人汪一龍曹涇爲之師先生爲學正

江集

祕監吳義山先生鄒

吳鄒永新人宋末兵亂避仇轉徙山西改姓名張應珍

自號義山先生示不忘其故土注周易宗程朱而不為

苟同元駙馬都尉高唐郡王闕里吉思嘗從之質疑焉

為刻其書于平陽路

吉安府志

梓材謹案吉安府志附先生於宋遺民之列朱氏經義考據元祕書題名張應珍以至元三十年十

二月由從事郎歷祕書監丞大德八年六月遷祕書少監九年十月乃更姓名吳郡以為嘗仕於元

論世者所當知也

隱君歐陽道江先生仇

歐陽仇字以大長樂人隱居著述動循禮法學者師焉

梓材案閩書云學者稱道江先生

著有四書釋疑五經旨要性理學辨

格物啓蒙忠孝大訓女範等書

道南原委

義士陳先生有霖

別見呂范諸儒學案補遺

學正黃先生瑞節

黃瑞節字觀樂安福人舉鄉試授太和州學正元季遂不仕隱居力學萃朱子所定太極圖通書正蒙易學啓蒙家禮律呂新書皇極經世諸書兼加註釋目曰朱子

成書

吉安府志

梓材謹案蔡氏九儒書載黃瑞節挽西山先生云直所遭之慘今天意奚屈忽訃音遽聞兮哀慟不淑痛哲人云亡兮邦國殄瘁感死生永訣兮莫覩其怨傷吾道終窮兮何心於世相長號以酹兮陰

輔吾志惟下觀而化兮風聲遠被想神之有靈兮
馨此鐫詩如其先生及見西山而入元不仕當有
百餘歲矣豈別
一黃瑞節耶

進士蔣竹山先生捷

蔣捷字勝欲陽羨人德祐進士元初遁迹不仕大德間
憲使薦其才卒不就平生著述一以義理爲主其小學
詳斷發明旨趣尤多學者以其家竹山咸稱爲竹山先

生

姓譜

鄉貢何志軒先生安子

何安子字定夫自號志軒鄉貢進士程雪樓序其四書

後云能于朱子之說有所發明不阿隨又不詭異他日
當與黃饒二先生之說並傳

程雪樓集

縣尉胡梅巖先生次焱

胡次焱字濟鼎婺源人咸淳四年進士授湖口主簿改
貴池尉元兵至境總制以城降微服脫歸或勸其仕作
媒嬖問答詩以見志著有四書注諸書人稱梅巖先生

安徽通志

梓材謹案萬姓統譜謂其歸家
以易教授鄉里有餘學齋易說

知事劉知非先生德智

劉德智字彥明歙縣人其父以張爲後于劉先生少知
自厲于學好讀孫吳兵法旁究釋老方伎之書已乃大
悟求之四書浩有所得選爲建德路儒學正歷官平江
路總管府知事卒始字千里謂其取義之未廣也易其
字晚又號知非子其詩文曰紫溪集

柳待制集

馬先生瑩

馬瑩字仲珍建德人尙書大同之七世從孫也精研經
史旁通諸子百家下逮山經地志謠俗方言朝披夕攬
舉華躋英彙次所著五經大義四書答疑及自問自答

策曰因天集別有講義讀書記各二十卷詩集曰歲遷
凡四十卷又銘贊記序雜古賦十卷柳道傳謂其學本
之經驗之人事而槩發之于言故能致多如是然反而
求之見其約不見其博云

柳待制集

文靖胡紫山先生祗遜

胡祗遜字紹聞武安人中統初累官應奉翰林文字調
右司員外郎時阿合馬當國進用羣小官冗事繁先生
建言省官莫如省吏省吏莫如省事以是忤權奸出爲
太原路治中後改浙西道提刑按察使尋以疾歸以耆

德第一人徵不就卒諡文靖

姓譜

梓材謹案先生仕至翰林學士
大中大夫見王秋澗所作祠記

附錄

爲濟寧路總管移治鉅野縣自國初經兵戈其廢已久
民居未集風俗朴野先生選郡子弟擇師教之親爲講
論期變其俗久之治效以最稱

王秋澗序先生易直解曰昔宋名儒劉斯立作學易堂
記但序日用常行事而曰余學易矣論者以爲得體況
紫山踐履工夫形諸事業復推已所得纂而成書啓迪

後人可謂得聖賢忠恕之道矣

趙隆齋先生采

趙采字德亮號隆齋潼川人著周易折衷其書以程朱
爲主而附以己見閒采先儒象數變互以相發明

曹能始說

周易傳義折衷自序

有康節邵子推明義文之卦畫而象數之學著有伊川
程子推衍夫子之意而卦畫之理明武夷朱文公作本
義釐正上下經十翼而還其舊作啓蒙本邵子而發先
天雖本義專主卜筮然于門人問答又以爲易中先儒

舊說皆不可廢但互體五行納甲飛伏之類未及致思
故愚以爲今時學者之讀易當由邵程朱三先生之說
泝而上之以會義文周孔之心庶幾可與言易矣

梓材謹案四庫全書著錄先生周易程朱傳義折衷三十三卷又案經義考載某氏德亮家人經傳衍義云案德亮不知其姓氏疑是趙采所撰當是也

貞敏蕭勤齋先生

文貞同樂庵先生

並詳蕭同諸儒學案

于先生

于景龍婺源人好深沈之思取朱子小學書句釋章解

以行世

戴剡源集

袁敏齋先生俊翁

袁俊翁著四書疑節十二卷

經義考

梓材謹案先生號敏齋袁州人朱氏以其四書疑節為未見然四庫全書著錄浙江汪啟淑家藏本則是書具在也提要稱其前有黎立武李應星序又有彭元龍序二篇應星元龍序皆稱俊翁獨立武序作雋翁蓋傳寫字異也又云立武應星序及元龍前一序並側注經史疑義字元龍後一序又側注四書經疑字而卷首標題則作待問集四書疑節互相參錯考俊翁題詞稱科目以四書設疑以經史發策因取四書經史門分而類析之蓋待問集者其總名經史疑義四書經疑其中之子部今經史疑義已佚故序與書兩不相應也又云其例以四書之文互相參對為題或似異而實同或

似同而實異或闡義理或用考證皆標問於前列
答於後蓋當時之體如是雖亦科舉之學然非融
貫經義昭晰無疑則格闕不能下

一語非猶夫明人科舉之學也

進士彭先生復初

附詳張祝諸儒學案

隱君翁先生森

翁森字秀卿仙居人隱居教授取朱子白鹿洞學規以
爲訓從游者前後至八百餘人有一瓢稿行于世

浙江通志

四時讀書樂詩

山光照檻水繞廊舞雩歸詠春風香好鳥枝頭亦朋友
落花水面皆文章蹉跎莫遣韶光老人生惟有讀書好